

EDITORIAL

# Mag-andam sa mosunod nga yugto sa kalihukang protesta batok sa korapsyon ug pasismo sa rehimeng Marcos

**K**apinkun-kulang tulo ka bulan ang gilungtad sa milabayng unang yugto sa kalihukang protesta batok sa korapsyon ug burukrata-kapitalismo. Nagsugod kini niadtong Setyembre ug misangpot sa nasudnong koordinadong demonstrasyon niining Nobyembre 30. Matag semana taliwala niini, adunay mga *walkout* ug demonstrasyon sa mga estudyante sa mga unibersidad gikan sa amihanang Luzon hangtud sa mga syudad sa Visayas ug Mindanao. Sa nagkalain-laing komunidad, lungsod, pabrika, upisina, ug simbahan, nagrati ug nagmartsa ang nagkalain-laing sektor nga gihiusa sa komon nga kasilag sa korapsyon ug sa dunot nga sistema.

Nagsugod sa iskandalo sa binilyong pisong kikkab sa puno sa anomalyang proyektong *flood control*. Sa wala madugay, mibuto ang uban pang mas grabeng porma sa korapsyon sa guberno. Nabutyag ang maanomalyang “farm-to-market road” ug nagkalain-laing imprastruktura. Nabutyag usab ang gatusan ka bilyong pisong “alokabul” sa nasudnong badyet, ug ang iligal nga paggamit ni Marcos sa pondo sa PhilHealth.

Nagsugod sa panawagan nga “tanang nalambigit, kinahanglang manubag” ug pagmakmak sa mga upisyal sa DPWH ug sa ilang mga kakunsabang kontraktor, kongresista, ug senador. Wala madugay, singgit na sa mga kabatan-onan ug sa lain-laing sektor ang “Marcos, Duterte papahawaon!” human mabutyag nga si Marcos mismo mao ang

Hari sa Kawatan nga anaa sa pungkay sa bungtod nga gikawat nga bahandi, ug si Sara Duterte mao ang Reyna sa Korapsyon nga nag-usik-usik sa gatusan ka milyong pondo sa katawhan. Gihisgutan karon ang pagtukod og *national transition council* aron iduso ang interes sa demokratikong mga sektor sa unsamang ipuli nga guberno.

Ang pagbaha sa protesta sukad

Setyembre mahimong ikumpara sa makasaysayanong mga balud sa protesta sa nasud. Sa milabayng mga dekada, miulbo sa makadaghang higayon ang protesta sa katawhan nga nakapalagpot sa duha ka presidente (Marcos niadtong 1986 ug Estrada niadtong 2001). Dugang pa niini ang makinasudnong pag-alsa sa mga kabatan-onan sa First Quarter Storm niadtong 1970, mga welgang bayan niadtong 1989-1990, mga rali batok sa korap ug pasistang rehimeng Arroyo, ug lapad nga demonstrasyon batok sa *pork barrel* niadtong 2013-2014.

Salamin sa lapad ug lalum nga kasuko sa katawhan ang pag-ulbo sa kalihukang protesta. Ang paspas nga pagbusikad niini timaan sa nagbukal-bukal nga kasuko sa ka-



tawhan sa walay hunong nga pagsa-ka sa presyo, paglansang sa sweldo, ug kinatibuk-ang pagkahagba sa ilang panginabuhian, gikan pa sa panahon ni Duterte ug ilabina sukad milingkod si Marcos sa gahum. Labaw pang midilaab ang kasuko sa katawhan atubangan sa malukpa-nong kalamidad gikan sa Cebu hangtud Palawan tungod sa bagyo ug sa palpak nga proyektong *flood control*. Ang pagbalsa sa binilyong pisong kwarta sa katawhan nagdugang pa sa dili mahubsang kasuko sa katawhan sa kawatan nga pamilyang Marcos.

Naglungang sa lalum nga pulitikanhong krisis ang rehimeng Marcos tungod sa pagkusog sa mga protesta. Labaw kining natay-og dihang nabutyag nga si Marcos mismo ang nakadawat og dili moubos sa ₱25 bilyong kikkab o “SOP” isip bayad sa mga proyektong imprastruktura nga iyang gimando nga isal-ot sa badyet. Sa pagsulay nga panalipdan si Marcos, pipila ka taas nga upisyal niya ang gisakripisyo ug gipapahawa. Lakip niini ang hepe sa gabinete nga ginganlang nalambigit sa anomalya.

Gitukod ni Marcos ang “independyenteng komisyon” nga kuno para mag-imbestiga sa mga ano-

malya, apan ang tinuod, ginatabunan niini ang papel sa Malacañang sa korapsyon. Para magpakitang-gilas ug pahupayon ug ilikay gikan ka-niya ang kasuko sa katawhan, giduso karon ni Marcos nga kasuhan ug dakpon ang pipila ka dagkung kontraktor ug iladong mga pulitiko.

Nagpakaaron-ingnon nga kontra-korapsyon si Marcos sumala sa tambag sa imperyalistang amo aron pahuyangon ang kalihukang protesta batok sa korapsyon. Kaa-bag niya ang pipila ka lider sa Akbayan nga subsub ang paningkamot nga ilihis ang kalihukang anti-korapsyon gikan sa pagpanubag kang Marcos ug pagtabon sa panawagan nga papahawaon siya. Subay usab sa tambag sa US, gimando ni Marcos ang dugang pagtaas sa sweldo sa mga sundalo ug pulis aron konsolidahon ang iyang kontrol sa AFP ug PNP ug mas hingpit nga magamit kini sa brutal nga todo-gera batok sa masang maguuma sa kabanikanhan ug sa pagsumpo sa hulga sa labaw pang paglapad sa mga protesta sa katawhan sa umalabot.

Human sa makanunayong paglapad sukad Setyembre, anaa karon sa yugto sa konsolidasyon ang kalihukang protesta batok sa korapsyon

ug burukrata-kapitalismo, sa pagpalig-on ug pag-andam alang sa subling pagbwelo. Hagit sa mga nasudnon-demokratikong pwersa nga anaa sa unahan sa kalihukan ang pag-sumada ug pagkuha og mga leksyon gikan sa milabayng tulo ka bulan. Hagit nga palig-onon ug palapdon ang ilang mga kahugpungan, dugang palapdon ang ilang mga al-yansa, ug palig-onon ang baruganan ug determinasyon sa pagbatok sa korapsyon sa rehimeng US-Marcos.

Hagit kanila nga padayong mag-andam sa mosunod nga yugto pinaagi sa pag-abot ug pag-organi-sa sa mas daghang mga pabrika, komunidad sa kabus, eskwelahan, ug ubang sentro sa populasyon sa tibuok nasud, ug pagpadaghan sa mga aksyong protesta sa masa sa ilang lokalidad. Hagit nga palalumon ang pagsabot sa burukrata-kapitalismo sa lain-laing porma niini ug sa gamot nga mga problema sa pag-antus sa katawhan. Kinahanglang palapdon pa ang alyansang anti-korapsyon ug pahugton ang panaghiusa batok sa paghari sa mga Marcos ug Duterte. Hagit usab ang pagbutyag sa mga pekeng progresibo ug ultra-konserbatibo aron mabira ang masa batok sa korapsyon nga ilang ginalingla ug ginalihis sa sayop nga dalan sa pagyukbo sa hari sa korapsyon.

Hagit sa Partido ug mga rebolusyonaryong pwersa nga magpalig-on taliwala sa nagpadayon nga lapad nga kalihukang anti-korapsyon sa katawhan ug pagsupak sa pasismo sa rehimeng US-Marcos. Dugang palapdon ang mga tago nga organisasyong masa aron padayon nga pukawon ug awhagon ang lapad nga masa sa katawhan nga ias-dang sa demokratikong rebolusyon sa katawhan isip tinuod nga solusyon sa krisis. Atubangan sa grabeng pagdumot sa nagnana nga kadunot sa tibuok reaksyunaryong estado, haum kaayo karon ang sitwasyon sa pagrekrut alang sa Bagong Hukbong Bayan ug sa pagpaas-dang sa gubat sa katawhan sa kabanikanhan.



Bol. LVI Ihap 23 | Disyembre 7, 2025

Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles.

Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.

## Unod

**Editorial:** Mag-andam sa mosunod nga yugto sa kalihukang protesta batok sa korapsyon ug pasismo sa rehimeng Marcos 1

Liboan, subling mibarog kontra korapsyon 3

Walay hunong nga mga protesta 3

Hinakog nga pagpangawkaw ni Marcos 4

Nagpakusog ang KM alang sa DRB 5

Edukasyon alang sa komunistang pagremolda 6

Pasismo sa pusod sa mga imperyalistang nasud 7

Sa mubong pagkasulti 8

4 ka sundalo, napatay sa mga engkwentro 9

Paghari sa militar sa isla sa Samar ug Kalinga 9

Mga protesta 9

Buhian ang mga mariposa! 10

Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas

 [ang.bayan@cpp.ph](mailto:ang.bayan@cpp.ph)

# Liboan ka Pilipino, subling mibarog batok sa korapsyon

Subling nagmartsa sa kalsada niadtong Nobyembre 30 ang liboan ka Pilipino sa lain-laing bahin sa nasud aron magprotesta batok sa nangabutyag nga malukpanong korapsyon sa gubyrno. Atol kini sa ika-162 nga adlawng natawhan sa amahan sa rebolusyong Pilipino nga si Andres Bonifacio.

Niadtong adlaw, milanog ang mga panawagan sa katawhan sa pagpanubag sa tanang nalambigit sa kahiwian, pagbungkag sa mga dinastiya sa pulitika, ug pagpahawa sa poder sa presidente nga si Ferdinand Marcos Jr, bise presidente nga si Sara Duterte, ug uban pang kurap nga mga upisyal.

Sa pagpasiugda sa Kilusang Bayan Kontra Kurakot (KBKK), kapin sa 20,000 ang nagtapok sa Luneta Park sa Maynila alang sa protestang Baha sa Luneta 2.0. Gisulayan sa rehimeng Marcos nga pugngan ang protesta sa pagbawal kanila nga magtapok ug maghimo og programa. Wala mapugngi sa maong pagpanabotahe ang singgit sa katawhan alang sa akawntabilidad ug hustisya.

Mitambong sa protesta ang nagkalain-laing grupo, pwersa, ug sektor lakip ang mga mamumuo, mag-uuma, kabus-sa-kasyudaran, estudyante, kababayan-an, ug mga tawong simbahan. Sama sa una nang gideklara sa KBKK, abli niining gidawat ang nagkalain-laing panawagan sa mga grupo lakip ang pagpapahawa kang Marcos ug Duterte ug pagtukod og *transition council*.

Liboan usab ang nagtapok sa protestang Trillion Peso March 2.0 nga gihimo sa EDSA sa Quezon City. Gipangulohan kini sa Simbahang Katolika ug uban pang grupo ug partido nga sakop sa Trillion Peso March Movement (TPMM).

Sa wala pa ang mga protesta, naningkamot apan napakyas ang KBKK nga makighiusa sa TPMM para sa hiniyang protesta sa Metro Manila. Wala mouyon ang mga grupo sa TPMM, ilabina ang Akbayan,

nga dayag nga dad-on sa mga grupong sakop sa KBKK ang mga panawagang direktang nagtumong kang Marcos sa sistematikong korapsyon.

Gawas sa Metro Manila, nagprotesta ang mga grupong kaalyado sa KBKK sa Baguio City, La Union, Ilocos Sur, Ilocos Norte, Isabela, Tarlac, Calamba City, Cavite, Oriental Mindoro, Legazpi City, Naga City, Antique, Capiz, Aklan, Iloilo City, Bacolod City, Cebu City, Tacloban City, Davao City, Cagayan de Oro City, ug sa General Santos City. Natala usab ang mga misa, panagtigum, ug martsa sa mga pari ug lider sa simbahan kauban ang katawhan sa dili moubos sa 86 ka diyosesis sa tibuok nasud.

Sa gawas sa Pilipinas, halos 2,000 ka migranteng Pilipino ug mga kaalyado sa 30 ka syudad sa 23 ka nasud ang miapil sa kalibutanong protesta batok sa korapsyon. Gipangulohan kini sa bag-ong gitukod nga KBKK-Global.

## Step down batok step up

Labaw pang mihait ang kalainan sa panawagan sa mga grupo kabahin sa pagpanubag mismo kang Marcos. Mibalibad ang Akbayan, usa sa nanguna sa TPMM, sa pag-ila sa grabeng korapsyon ni Marcos ug nanawagan na hinuon nga “mag-step up” siya sa pakigbatok sa korapsyon. Sukwahi kaayo kini sa posisyon sa KBKK nga dako ang tulubagon ni Marcos sa sistematikong kahiwian sa gubyrno.

Nanawagan usab ang Akbayan kang Marcos nga himuong prayoridad ang “anti-dynasty bill,” bisan og ang pamilya niini mao ang labing bangkaroteng dinastiya sa pulitika.

“Step down” (kanaog na) ang

## Walay undang nga mga protesta

AYHA UG HUMAN sa Nobyembre 30, padayon ang paglunsad sa KBKK og mga Black Friday Protest ug uban pang aktibidad.

Tataw niadtong Nobyembre 21 ang nasudnong *walkout* sa Youth Rage Against Corruption. Nagmartsa ang 1,500 ka kabatan-onan sa Mendiola niadtong adlaw. Pagkaugma, magkabulag nga aktibidad ang gilunsad sa Seniors Kontra Kurakot ug sa mga siklista isip protesta.

Niadtong Nobyembre 28, usa ka nasudnong *sit-down strike* ug protesta ang gipangunahan sa Alliance of Concerned Teachers-Philippines. Nakighiusa sa aktibidad ang mga magtutudlo sa kapin 400 ka pangpublikong eskwelahan sa 14 ka rehiyon sa nasud.

panawagan sa Bagong Alyansang Makabayan (Bayan, sakop sa KBKK) kang Marcos. Kini aron mahatagan og dalan ang libre ug hingpit nga imbestigasyon batok sa korapsyon ug atubangon ang iyang mga krimen batok sa katawhang Pilipino.

Human ang protesta sa KBKK sa Luneta Park, gipangulohan sa Bayan ang martsa padulong sa Mendiola aron singilon si Marcos. Gipanawagan sa grupo ang pagpahawa kang Marcos ug Duterte. Gipanawagan nila nga ilisan sila sa usa ka *national transition council*. Sama sa miagi, giharang sila sa liboan ka pulis ug napugos magprograma atubangan sa University of the East sa Recto Avenue. Nakigmartsa sa Bayan ang mga pwersa sa Partido Lakas ng Masa, Bukluran ng Manggagawang Pilipino, ug Sanlakas.

Sa katapusan sa programa sa Recto Avenue, giguba sa mga raliyista ang *effigy* ni Marcos nga nagsul-ob og korona ug *sash* nga bandila sa US.

# Hinakog nga pagpangawkaw ni Marcos sa kwarta sa katawhan

Dili ikalimod nga si Ferdinand Marcos Jr mao ang utok ug labing dakung buaya nga kinahanglang papanubagon sa malukpanong korapsyon sa gubyrno. Sa milabayng halos tulo ka bulan, padayon nga nabutyag ang mga kahiwan nga direkta niyang gikalambigitan, sa iyang pamilya, ug sa iyang labing suod nga mga upisyal. Hapit nang mamatay ang ICI, ang iyang gitukod nga komisyon aron pahupayon ang kasuko sa korapsyon ug limpyohan ang iyang ngalan.

Kaabag ang iyang mga upisyal sa mga departamento ug mga kaksunsa sa kongreso ug senado, gibalik niya ang sistema sa *pork barrel* sa porma sa mga “allocable.” Gihakop niya ang binilyong personal nga *pork barrel* sa porma sa *confidential and intelligence funds* ug sa pondo alang sa *unprogrammed appropriations* (UA). Nag-atubang siya sa mga anomalya nga mahimong basehan sa *pag-impeach* kaniya.

## Paggamit sa UA sa *flood control*

Karong Disyembre, gibutyag ni kanhing Justice Antonio Carpio sa Korte Suprema ang pruwera sa koneksyon tali sa pagbalhin sa pondo sa PhilHealth ug sa mga maanomalyang proyektong *flood control*. Niadtong 2024, nahimong bahin sa UA ni Marcos ang ₱60 bilyong pondo sa PhilHealth nga “gibalik” sa gubyrno. Gawas niini, gibalhin usab sa UA ang ₱170 bilyong kita sa Philippine Deposit Insurance Corporation (PDIC). Gagamit ni Marcos ang maong UA aron pondohan ang mga palpak ug *ghost* nga proyektong *flood control* (₱170 bilyon) ug uban pa sama sa Davao Bypass Road Project.

Sumala kang Carpio, supak sa konstitusyon ang gibuhat ni Ralph Recto, kaniadto kalihim sa pinansya ug karon *executive secretary* ni Marcos, sa pagbalhin sa pondo ngadto sa UA.

Bag-o lang nagdesisyon ang Korte Suprema nga ilegal ang pagbalhin ug gimando nga ibalik ang pondo sa PhilHealth.


## Kikbak, smuggling, ug manipulasyon sa presyo

Sukad Nobyembre 14, pito ka bidyo ang gipagawas ni Elizalde Co, kanhi representante sa Ako Bicol Partylist ug hepe sa komite sa badyet sa Kongreso, nga nagbisto sa korapsyon sa pamilyang Marcos. Sa unang tulo ka bidyo, gibutyag ni Co nga gisugo siya ni Marcos nga isalot sa badyet sa 2025 ang mga proyektong nagkantidad og ₱100 bilyon. Gibanabanang mikobra si Marcos og ₱25 bilyong kikbak. Matud pa ni Co, nakahatag siyag kapin ₱50 bilyon nga susamang kikbak kang kanhi *house speaker* Rep. Martin Romualdez ug kang Marcos sukad 2022.

Sa laing bidyo, gibutyag ni Co nga gisugo siya sa anak ni presidente nga si Rep. Sandro Marcos sa pagsalot og ₱50.9 bilyon sa badyet gikan 2023 hangtud 2025 alang sa iyang personal nga kikbak. Sa lain pa nga bidyo, gilambigit ni Co ang asawa ni Marcos nga si Liza Araneta-Marcos sa malukpanong ismagling sa bugas, isda, ug utan. Matud pa niya, gipugngan ni Araneta-Marcos ang imbestigasyon sa Kongreso mahitungod sa smuggling sa bugas ug sibuyas aron tabunan ang papel sa iyang igsuon nga si Martin Araneta nga maoy tigpasiugda sa ismagling ug manipulasyon sa presyo sa bugas ug utan sukad 2022.

## “Allocable” isip bag-ong *pork barrel*

Sukad 2022, gisalot sa rehiyong Marcos, kakunsaba ang mga



kongresista ug senador, ang *pork barrel* sa badyet sa gitawag niining “allocable” o “pwedeng igahin.” Sa simpleng pulong, ang allocable mao ang gitakdang kantidad nga mopadulong sa matag kongresista sa mga distrito. Lakip kini sa National Expenditure Program sa presidente ubos sa badyet sa DPWH. Makolekta sa usa ka kongresista ang iyang “allocable” pinaagi sa pagsumite og mga proyektong imprastruktura nga aprobahan sa presidente.

Sa imbestigasyon sa Philippine Center for Investigative Journalism (PCIJ), nabutyag nga si Rep. Marcos adunay pinakadakung *allocable* (₱15.79 bilyon) gikan 2023 hangtud 2025. Ikaduha siya sa iyang uyoan nga si Rep. Romualdez nga nakakuha og ₱14.43 bilyon. Miabot sa ₱1.2 trilyon ang kinatibuk-ang *allocable* nga gipangbahinbahin sa 254 ka kongresista sa 14 ka rehiyon sa milabayng tulo ka tuig.

Anaa pa gihapon sa badyet sa 2026 ang mga *allocable*. Naggahin ang Kongreso og ₱400 bilyon alang sa ilang kaugalingon. Gipulihan sa mga kongresista ang ilang gipangayong proyektong *flood control* ngadto sa mga *farm-to-market road*, irigasyon, klasrum, pasilidad panglawas, balay, ug terminal sa *airport*. Kini aron dili matangtang sa badyet ang ilang pondo. Aduna pay ₱100 bilyon nga *non-allocable* nga gitawag og “free-for-all” nga *pork barrel*. **AB**

# Nagpalig-on ang Kabataang Makabayan alang sa gubat sa katawhan

**I** sip pagsaulog sa ika-61 nga anibersaryo sa Kabataang Makabayan (KM) niadtong Nobyembre 30, naglunsad og pagtuon, asembliya, rali, ug uban pang aktibidad ang mga balangay niini. Paningkamot usab kini sa KM aron palagsikon ang tago nga kalihukan sa han-ay sa mga kabatan-onan ug pakusong ang ilang pagsalmot sa rebolusyonaryong kalihukan.

Nagpalig-on ang KM samtang nanguna ang mga kabatan-onang Pilipino sa malukpanong mga protesta batok sa korapsyon sa tibuok nasud sukad pa niadtong Setyembre. Giawhag sa KM ang mga kabatan-onan nga padayong pakusogon ang ilang singgit ug pagbatok sa korapsyon ug burukrata-kapitalismo. Dungan niini, gitin-aw nila nga ang tinuod nga kausaban makab-ot lamang sa mga kabatan-onan ug katawhan pinaagi sa gubat sa katawhan.

## Tun-an ang gubat sa katawhan

Sa Maynila, usa ka balangay sa KM sa usa ka kolehiyo ang nagtapok aron hisgutan ang sinulat ni Ka Amado Guerrero nga Ang Mga Partikular nga Kinaiya sa Atong Gubat sa Katawhan. Gipili nila kini aron tun-an ang gubat sa katawhan nga gilunsad sa Bagong Hukbong Bayan (BHB), masabtan ang mga partikularidad niini, ug mahibal-an ang pamaaagi sa pagpaasdang niini gikan sa usa ka yugto ngadto sa lain pa.

“Napalalum niini ang akong pagsabot sa gubat sa katawhan,” pagpaambit ni Ka Sharon, bag-ong rekrut sa KM. “Taliwala sa akong hut-ong gigikanan, mas *excited* ko karon nga moapil sa sunod nga grupo sa mga estudyante nga *mo-integrate* sa rebolusyon,” matud pa ni Ka Len.

Duyog usab nga nananaw ang mga sakop sa KM og dokumentaryo sa Sine Proletaryo nga Buhay Komunista 2, nagtuon og rebolusyonaryong kantang Pagbati, ug nagbasa og balak nga Ang Gerilya Ay Tulad Ng Makata

ni Kaubang Jose Maria Sison. Gitunan usab sa balangay ang mahitunogod sa paghimo og rebolusyonaryong arte ug sa pagkapareho niini sa arte sa gerilyang pakiggubat.

Nagpadayag sa optimismo ang upisyal sa balangay nga si Ka Ces sa maayong ibunga sa ilang panagtigum. “Hinaot nga mahatagaan kita og kusog niining mga diskusyon aron mas mapanday pa nato ang atong kaugalingon sa ideolohiya,” matud pa niya. Labaw kining gikinahanglan sa mga myembro sa KM atubangan sa nagkagrabeng pulitikanhong sitwasyon ubos sa rehimeng Marcos.

## Mga rali, asembliya, ug OP-OD sa KM

Taliwala sa pasistang pagpanumpo sa rehimen, mahukmanong nalunsad sa mga balangay sa KM ang mga rali, asembliya, ug operasyon pinta-operasyon dikit (OP-OD) sa pipila ka mga dapit. Maayo nilang giplano kini aron masiguro ang kaluwasan sa seguridad sa matag ak-

tibidad.

Niadtong Nobyembre 27 ug 28, ug Disyembre 5, naglunsad og rali ang mga balangay sa KM sa Quezon City ug Maynila. Dala ang bandera sa KM, nanawagan sila sa mga kabatan-onan ug katawhang Pilipino nga mosalmot sa BHB ug ihalad ang kusog, kalantip, ug abilidad sa pagpaasdang sa gubat sa katawhan.

Sa Metro Manila, tulo ka asembliya sa KM ang napahigayon niadtong Nobyembre. Samtang, nakalunsad og OP-OD ang mga balangay sa KM sa De La Salle University (DLSU)-Manila, DLS-College of St. Benilde, University of the Philippines (UP)-Manila, ug Polytechnic University of the Philippines sa Maynila. Gikasa usab kini sa KM sa UP Los Baños sa Calamba City, Laguna, ug sa UP Cebu. Sa Canada, gireport usab sa usa ka balangay sa KM nga gilangkuban sa mga kabatan-onang migranteng Pilipino ug diaspora ang paglunsad og OP-OD.

Walag too usab ang pamahayag sa mga balangay sa KM alang sa pagsaulog sa anibersaryo niini. Gipasidunggan nila si Ka Joma, ang nangulo sa pagtukod sa KM, alang sa bahandianong mga leksyon nga iyang kabilin sa mga kabatan-onan sa pagpaasdang sa rebolusyong Pilipino. Lakip sa nagpagawas og pamahayag ang mga balangay niini gikan sa rehiyon sa Ilocos, Metro Manila, Negros Island, Panay, ug sa Laguna, Cavite, ug Cebu.

“Sa atong paglubog sa masa, mapangahas natong palig-onon ang atong baruganan. Giaghat kita nga mobiya na sa atong komportableng kinabuhi ug naandang kinaiya... labaw nga bililhon ang sakripisyo aron tapuson ang dunot nga sistema,” pamahayag sa KM. **AB**



# Edukasyon para sa komunistang pagremolda sa mga manggugubat

**S**a hukbong bayan, mahinungdanon ang pagtuon aron maumol ang mga manggugubat isip mga proletaryong rebolusyonaryo.

Sa Luntian, usa ka yunit sa BHB sa Southern Tagalog, gisiguro sa komite sa Partido sulod niini nga mapataas ang lebel sa teoretikal nga pagsabot sa Marxismo-Leninismo-Maoismo. Higpit kining gisumpay sa kongkretong rebolusyonaryong praktika sa yunit.

“Ang nahimong hagit sa pagpatuman sa gimbuhatong edukasyon sa hukbong bayan mao ang ginaatubang nga sitwasyong militar,” matud ni Ka Reymundo, kumander sa yunit. Halos usa ka tuig nga walay hunong ang maniobra sa Luntian tungod sa gipakusog nga operasyon sa Armed Forces of the Philippines. Midaghan ang gideploy nga tropa niini sa natarang gerilya. Gipasubsub usab ang paggamit niini og modernong armas ug teknolohiya.

## Pagpalagsik sa edukasyong pangpartido

Nakapokus ang kampanya sa edukasyon sa Luntian sa pagbaliktuon sa kasaysayan ug batakang pagtuki ug linya sa Partido. Pagsunod kini sa praktikal nga giya sa kalihukang pagtul-id nga gitakda sa Partido. Sukad 2024, gilunsad sa yunit ang regular ug espesyal nga mga kurso aron tun-an balik ang kasaypanan ug kahuyangan, ug palambuon ang mga kauban isip mga komunista. Lakip sa mga kurso ang Burukratisimo, Kumandismo ug Liberalismo, Tuliron ang mga Kasaypanan ug Subling Tukuron ang Partido, Komunista, Maging Abanteng Elemento ng Proletaryado, Batakang Balaod sa Partido ug Programa alang sa Demokratikong Rebolusyon sa Katawhan.

Dungan sa mga pagtuon ang programang Kolektibong Basa ug Kolektibong Talakayan (KBKT) sa mga dokumento. Kini aron mahimong pa-

milyar ang mga estudyante sa mga kurso. Naaghat niini ang mga kauban nga kaniadto walay ganang mobasa o mosalmot sa diskusyon. Kung makalimtan, ang mga manggugubat na mismo ang mangutana: “Wala bay KBKT karon?”

Nahimong aktibidad usab ang Rebokabularyo sa matag adlaw. Gipaila ug gipatin-aw niini ang mabug-at nga mga termino, balaod, ug importanteng tawo nga anaa sa mga leksyon matag adlaw.

Matag moabot ang mensahe sa Komite Sentral ug Komiteng Rehiyon sa mga anibersaryo sa Partido ug Hukbo, ginahisgutan kini dayon. Gisalmutan kini sa mga kadre ug myembro sa Partido sa lain-laing lebel, ug bisan sa rebolusyonaryong masa.

## Pagpunting sa mga kahuyangan

Hugot nga ginasumpay sa kongkretong rebolusyonaryong praktika sa mga kauban ang mga pagtuon. Ginakuha ang mga pananglitan gikan sa aktwal nga kasinatian sa yunit ug praktika sa mga kauban.

Tungod niini, nahimong pamaagi sa pagtuon sa paghiusa sa mga pagases ug pagsumada sa mga isyu nga giatubang sa yunit.

Naaghat ang mga kauban nga balikan ang kaugalingong rebolusyonaryong praktika sa panahon sa pagtuon ug gamiton kini isip giya sa pagsumada sa kaugalingon. Sa panahon sa diskusyon, mas hanoy nga napakita sa mga kauban ang mga sayop ug kahuyangan sa indibidwal.

“Daghang beses ko nga naigo sa pagtuon, sa unsay angay buhaton,



ug unsa gyud ang kahulugan sa ti-buok-kasingkasing nga pag-alagad,” matud sa usa ka estudyante sa pagases sa pagtuon nga nakapokus sa mga pamaagi unsaon pagpakamaayo isip proletaryado.

## Pasalikway sa empirismo

Ang pagpataas sa praktika ngadto sa teoretikanhong ang-ang sa mga kauban mao ang yawe sa pagbatok sa empirismo. Giya kini sa mga pagtuki ug pagsumada. Tungod niining magbunga og mas taas nga rebolusyonaryong praktika.

Sa mga pagtuon, gidasig ang mga kauban nga mahimong mas kritikal sa kaugalingon ug sa uban mahitungod sa sayop nga estilo sa pagtrabaho. Daku ang tabang niini sa pagbatok sa daghan nga indibidwal ug kolektibong kahuyangan sa yunit. Yawe usab kini sa pagsulbad sa mga panagbangi nga naggikan sa lain-laing ideya, praktika, ug estilo.

“Adunay mga panagbangi sa pag-ila kun unsay husto ug sayop sa praktika, pagdomina sa empirismo ug indibidwalismo, nga padayong gibatukan sa yunit,” matud ni Ka Reymundo. Sa iyang lantaw, aduna nay pag-uswag niini nga mga panagbangi. Hinay-hinay na nga nagbag-o ang mga sayop nga batasan ug praktika sa mga kauban.

“Mas hugot na ang yunit sa pagpatuman sa mga nahiusahan,” matud pa niya.

AB

# Pasismo sa pusod sa mga imperyalistang nasud

**M**alampuson nga gipahigayon sa National Democratic Front of the Philippines (NDFP) ang ikalima nga internasyunal nga teoretikal nga kumperensya nga may temang Pasismo sa Ika-21 nga Siglo sa Pusod sa mga Imperyalistang Nasud. Gihimo kini gikan Nobyembre 28 hangtud 29 sa Utrecht, The Netherlands.

Gisalmutan ang kumperensya sa 125 ka indibidwal gikan sa 71 ka partido komunista ug organisasyong masa. Beynte sa maong mga partido ug grupo ang nagsumite og mga kontribusyon nga gihisgutan sa kumperensya. Gihalad sa NDFP ang kumperensya sa paghandum kay Ka Louie Jalandoni, proletaryong internasyunalista ug martir sa rebolusyong Pilipino.

Nakapukos ang duha ka adlaw nga kumperensya sa teoretikal ug historikal nga pagsabot sa pasismo gikan sa mga sinulat nila Lenin, Stalin, ug Mao. Gipalig-on niini ang kahulugan sa pasismo subay sa konsepto ni Georgi Dimitrov, usa ka komunistang Bulgarian nga nasilbing pangulo sa Communist International niadtong dekada 1930. Matud ni Dimitrov, ang makihut-ong nga kinaiya sa pasismo anaa sa porma sa “dayag nga diktadurya sa labing reaksyunaryo, labing sobinista, ug labing imperyalistang bahin sa kapitalismo sa pinansya.” Kinaiya sa monopolyo kapitalismo nga nalubog sa krisis ang pagka-anti-komunista, ultra-reaksyunaryo, ug kabangis sa pagsumpo sa hut-ong mamumuo.

Gihisgutan sa kumperensya ang subling pagkusog sa pasismo tungod sa krisis sa kapitalistang sistema sa kalibutan, ilabina human sa krisis sa pinansya niadtong 2008-2009. Giila nila ang mga porma sa pasismo ug pasisasyon sa mga imperyalistang nasud nga nakapokus sa mosunod: 1) pasisasyon sa burgis nga estado; 2) paggamit og AI (*artificial intelligence*) ug abanteng teknolohiya aron sumpuon ug dugang paghimuslan ang hut-ong mamumuo; 3) paggrave sa sobinismo ug reaksyunaryong mga ideolohiya; ug, 4) pagtunhay sa mga pasistang kalihukang masa.

Ang pasisasyon sa burgis nga estado mao ang proseso diin nahukasan ang burgis liberal nga demokrasya ug nabutyag ang mas awtoritaryan ug mapanumpuon nga lakang ngadto sa dayag nga paghari sa teror.

Adunay lagsik nga panaginambitay mahitungod sa interaksyon sa pasismo sa mga imperyalistang nasud ug sa mga neokolonya, diin batakang kinaiya sa estado mao ang pasismo. Sa mga semikolonya unang gisulayan ug gipatuman sa imperyalismo ang mga eksperimento sa paggamit og terorismo sa estado. Gigamit niini ang mga programa kontra-insurhensiya, ayudang militar, manipulasyon, ug bangis nga pagsumpo sa katawhan.

Adunay espesyal nga diskusyon sa talagsaong kasinatian sa Ireland, nga nag-ila sa kaugalingon isip kapitalistang semikolonya, ug Palestine, usa ka okupadong nasud. Sa mga malingkawasnong kalihukan niining mga nasura, gihiusa ang anti-pasista ug anti-imperyalistang pakigbisog.

Gipunting sa kumperensya isip hinanaling tahas sa proletaryado ang pagtukod og “organisasyon pang-away” aron suklan ang gitukod nga “organisasyong pang-away” sa mga pasistang kalihukan. Naghatag ang mga kauban gikan sa imperyalistang nasud og mga konkretong pananglitan sa anti-pasistang pakigbisog.

Gipaambit nila ang mga leksyon gikan sa ilang gimbuhatong masa, adbokasiya, pagdepensa sa kaugalingon, ug pag-organisa sulod sa mga unyon, partido, organisasyon, ug kalihukan. Gihatagan nilag duut ang importansya sa pagtukod sa lapad



nga anti-pasistang nagkahiusang prente sa mga mamumuo ug uban pang demokratikong sektor. Matud pa nila, ang pagtukod niini nga aliansa nagpasabot sa pagsalikway sa sektaryanismo ug konserbatismo, samtang nagmabinantayon batok sa mga sosyal demokrata ug uban pang oportunistang elemento. Nasayod sila nga integral ang pagpangulo sa proletaryado sa nagkahiusang prente sa pagsumpay sa mga pakigbisog sa masa sa pagwagtang sa gamut sa pasisasyon. Yawe kini sa pagbungkag sa monopolyo kapitalismo ug diktadurya sa burgesya.

Kumbinsido ang mga mitambong gikan sa mga imperyalistang nasud nga kinahanglang tukuron ang ligon nga partido sa mga mamumuo. Kinahanglang ipatuman ang mga sekretong operasyon, kakumbina ang dayag gimbuhaton, aron makasugakod sa pasistang atake ug makab-ot ang mga kadaugan alang sa hut-ong mamumuo. Kinahanglang usab nga labaw pang palapdon ang panaghiusa sa mga pakigbisog sa pusod sa mga imperyalistang nasud ug sa mga semikolonya.

Nahuman ang kumperensya sa mubo nga kulturanghong programa nga may temang “Gikan sa Palestine hangtud Pilipinas, bungkagon ang makinang iggugubat sa US,” dungan sa paghandum sa International Day of Solidarity with the People of Palestine.



27.3%↑

pagsaka sa presyo sa mga pagkaon para sa **noche buena** gikan 2011, o 2.3% kada tuig.

Gikan sa: BusinessWorld Noche Buena Index



25  
ka tuig na

ang **People's Liberation Guerrilla Army**, armadong gaway sa Communist Party of India-Maoist, niadtong Disyembre 2.




₱500

**badyet pang-noche buena** nga igo na daw para sa 5-katawong pamilya, matud sa Department of Trade and Industry.

Miani kini og grabeng batikos, ug gitawag sa mga mamumuo ug kabus nga "lutang" ug "insulto kaayo."

17 **COLD STORAGE FACILITY**  
(bugnaw nga tipiganan sa mga produkto aron dili madunot)

nga gitukod niadtong 2022 ug nagkantidad og ₱20 milyon kada usa ang dili magamit tungod sa palpak nga disenyo ug konstruksyon.



₱9.8 BILYON

pondong pang-ayuda ilalum sa Assistance to Nationals sa Department of Foreign Affairs ug ₱1.2 bilyong ayuda sa Agarang Kalinga at Saklolo para sa mga OFW na Nangangailangan sa Department of Migrant Workers ang giila nga susama sa mga *flood control* "ghost project" tungod wala kini natagamtam sa mga migranteng Pilipino.



₱17.56 TRILYON

na ang **utang ng Pilipinas** niadtong katapusan sa Oktubre 2025, mas taas og 10% gikan ₱16.02 trilyon niadtong Oktubre 2024.

120.5%  
**BED OCCUPANCY RATE**

**o ihap sa pasyente kada 100 ka katre sa mga ospital sa Pilipinas.**

Bulnerable ang mga adunay sakit ug mamumuo sa panglawas tungod sa pagdaso sa mga ospital, timaan nga anaa sa krisis ang sistemang panglawas.

27 **WEBSITE**

sa mga **alternatibong midya**, organisasyong masa ug uban pa ang gimando sa korte nga i-"unblock" o himuong *accessible* sa publiko;

Gipaboran sa korte ang petisyon sa Bulatlat, usa sa mga *gi-block*, nga ang gihimong "pag-block" usa ka pagsensor ug lapas sa kagawasan sa pag-estorya, pagpadayag ug pagpamahayag.



#### 4 ka sundalo sa AFP, napatay sa mga engkwentro sa BHB

NAPATAY SA Bagong Hukbong Bayan (BHB) ang upat ka sundalo sa Armed Forces of the Philippines (AFP) sa magkabulag nga engkwentro sa Samar ug Occidental Mindoro.

Sa pasiunang taho, dili moubos sa duha ka sundalo sa 8th ID ang napatay sa armadong aksyon sa BHB sa Barangay Babaclayon, San Jose de Buan, Samar niadtong Disyembre 3. Sa Occidental Mindoro, duha ka sundalo sa 76th IB ang napatay sa engkwentro sa Sityo Balite, Barangay Lumangbayan, Abra de Ilog niadtong Nobyembre 26. Daghan pa ang natahong nasamdan sa mga sundalo.

Samtang, niadtong Oktubre 28, tulo ka tropa sa 62nd IB ang napatay sa engkwentro sa BHB sa Barangay Quintin Remo, Moises Padilla, Negros Occidental. Sa pagkapildi niini, nagpaulan og bala ang 62nd IB ug napatay ang usa ka 6-anyos nga bata.

### Paghari sa militar sa isla sa Samar ug Kalinga

Sa Samar, gikan Nobyembre 22 militarizado ang mga barangay Gereganan, Marcos, San Miguel ug kasikbit nga mga komunidad sa Gandara. Bunga niini, kapin 100 ka lumulupyo sa barangay Marcos ug San Miguel ang napugos nga mobalhin sa ilang mga balay. Nagpahamtang usab og *hamlet* ang militar ug gipugngan ang pag-adto sa uma ug pagtrabaho.

Sa Northern Samar, naglunsad og *aerial bombing* ug pagpangistraping ang 8th ID sa Barangay Nipa, Palapag niadtong Nobyembre 29 sa alas-2 sa kaadlawon. Nagbunga kini og grabeng kahadlok sa mga residente.

Sa Kalinga, walay hunong ang operasyong kombatan sa 103rd IB sa mga barangay sa Pinukpuk human sa mga engkwentro niini sa hukbong bayan niadtong Nobyembre 21. Nagkampo ang mga sundalo sa mga sentrong komunidad nga perwisyo sa panginabuhi ug seguridad sa mga residente. Niadtong Nobyembre 30, giutingkay sa mga pulis ang balay sa tigpanalipud sa tawhanong katungod nga si Elma Awingan-Tuazon sa Barangay Cawagayan, Pinukpuk. Gisulong sa 20 ka pulis ang iyang balay sa pasangil nga nagpasilong sila og samarong manggugubat sa BHB.

Sa laing bahin sa nasud, natala ang mga kaso sa pagaresto, pagpanunog, ug pagpamig-ot sa militar. Sa Navotas City, giaresto sa mga pulis ang kontra demolisyong lider-kababaihan na si Jane Alfabeto niadtong Nobyembre 27.

Sa Negros Occidental, gisunog sa 15th IB ang balay sa mag-uumang si Carmelita Ulgasan sa Barangay Linaon niadtong Nobyembre 28 sa pasangil nga tigsuporta sila sa hukbong bayan. Padayon usab ang pagpamig-ot ni Warden Jsupt. Crisyrel Awe sa mga bilanggong pulitikal ug ubang priso sa prisohan sa Bago City. Nagprotesta ang mga priso ug ilang pamilya aron batukan kini niadtong Disyembre 3.

Sa Masbate, gikawat sa 2nd IB ang walo ka kabaw ug baka sa mga mag-uuma sa Lupaing Triple A sa Cawayan, Masbate niadtong Nobyembre 27. Ayha niini, gikawat usab sa mga sundalo ang inalimahang mananap sa mga mag-uuma sa mga barangay sa lungsod sa Mobo, Milagros ug Uson.



**Israel ug US, gihukmang sad-an sa krimen sa henosidyo ug *ecocide*.** Nahuman ang International People's Tribunal (IPT) on Palestine nga nahitabo niadtong Nobyembre 22-23 sa Spain sa paghukom nga sad-an ang Zionistang estado sa Israel ug mga kakunsa-ba niining gubyerno sa US, UK, Germany, France ug uban pa sa krimeng henosidyo ug *ecocide*.

Niadtong Nobyembre 29, adunay panagtapok ang mga grupong pro-Palestine sa pagpanguna sa Philippines-Palestine Friendship Association aron hisgutan ug huptan ang hukom sa IPT. Gilunsad human niining ang usa ka mubong protesta atubangan sa University of the Philippines-Manila kung asa gilunsad ang panagtapok.

**2 ka adlaw nga pagmakmak sa katutubong Cordilleran sa NCR.** Gideklara sa mga katutubo gikan sa Cordillera nga nagmalampuson ang 2 ka adlaw nga kalampagan sa nasudnong sentro niadtong Nobyembre 25 ug 26. Tumong niining ipaabot sa mga ahensya ug departamento sa gubyerno, ingonman sa Kongreso, ang mga reklamo sa mga katutubo gikan sa rehiyon. Gipasiugdahan ang kalampagan sa Cordillera People's Alliance.

**Planong demolisyon sa Taytay, gikundena.** Nagprotesta atubangan sa munisipyo sa Taytay, Rizal ang mga residente sa Sityo Sapang Gody ug Sityo Siwang sa Barangay San Juan niadtong Nobyembre 26 aron manawagan og dayalogo sa lokal nga gubyerno ug kundenahon ang hulgang demolisyon sa ilang lugar. Pugos nga ginailog sa Sta. Lucia Corporation ug ni Kristina Robles ang ilang gikaplastaran.

**Kabatan-onan, supak sa Davao Bus Project.** Nagprotesta ang Anakbayan-SMR niadtong Nobyembre 24 sa Davao City, aron ipanawagan ang pagbasura sa pekeng modernisasyon ug kontra-katawhan nga Davao Bus Project (DBP) sa lokal nga konseho sa Davao City. Ginapugos ang proyekto sa Asian Development Bank kakunsa-ba ang pamilyang Duterte sa syudad. Laraw sa proyekto nga lusawon ang nagaganan sistema sa transportasyon sa Davao nga gilangkuban sa mga moderno ug tradisyunal nga dyip, traysikel ug bus. Pagapondohan ang DBP og P54 bilyon nga utang gikan sa ADB.

# Buhian ang mga bilanggong pulitikal ug mga mariposa sa malingkawasong kalihukan

**M**atag tuig, sa Nobyembre 25, ginadumdum ang International Day for the Elimination of Violence Against Women (IDEVAW). Pag-ila kini sa pagka-martir sa mag-igsuong babaye nga Mirabal nga gipatay sa estado sa Dominican Republic niadtong 1960. Gimando niadtong panahona sa diktador nga si Rafael Trujillo ang pagpatay sa mag-igsuon nga sila Patria, Minerva, ug Maria Teresa tungod sa ilang pagsukol.

Ang mag-igsuon, naila isip mga mariposa (o alibangbang) sa ilang nasud, usa sa nagtukod sa anti-diktaduryang kalihukan nga “14th of June.” Nahimo silang simbolo sa anti-diktaduryang pakigbisog sa Dominican Republic ug bisan sa ubang nasud. Ang ilang kamatayon ang usa sa nahimong mitsa sa pagkahugno sa diktaduryang Trujillo, unum ka bulan human ang pagpatay.

Sama sa mag-igsuon nga Mirabal, libu-libong kababayan-an sa Pilipinas ang migamit sa ilang kahibalo, kusog, ug kinabuhi aron suklan ang pasismo sa estado, depensahan ang katungod sa kababayan-an, ug bag-ohon ang katilingban. Sama sa mga Mirabal, kabangis usab ang tubag kanila sa estado. Biktima sila sa pagdakop, pagdagit, detensyon, sekswal nga pagpangabuso, pugos nga pagkawala, ug pagpatay.

## Kabangis sa dili makatarunganong pag-aresto ug detensyon

Lakip sa mga biktima sa kabangis sa estado ang mag-igsuong Banjawan. Gidakop si Fatima, organisador sa Gabriela Youth, sa 85th IB niadtong Agosto 2, 2024 sa Santa Elena, Camarines Sur. Paglabay sa pipila ka bulan, gidakop usab si Pauline sa 59th IB niadtong Abril 26. Pareho sila gipailalum sa pisikal ug mental nga tortyur sa militar.

Sila Fatima ug Pauline usa lang sa gatusan ka babaye nga biktima sa pagdakop ug pagdagit ubos sa rehimeng US-Marcos.

Base sa tala sa grupong Karapatan, adunay 696 ka bilanggong pulitikal sa nasud, 164 niini gidakop ubos sa rehimeng Marcos. Sa mga

bilanggo, 146 mga babaye. Natala sa Ang Bayan ang 63 ka kaso sa pag-aresto sa kababayan-an, tulo niini uban ang bata o puya sa pagkadakop, ug lima niini mabdos. Kadaghanan sa nadakpan gikan sa Negros (14), sunod sa Bikol (10), ug Southern Tagalog (9).

Target sa estado ang mga batan-ong babaye nga mipili sa pag-organisa ug pag-alagad sa han-ay sa mga mamumuo, mag-uuma, mangingisda, ug katutubo. Lakip kanila sila Amanda Echanis, Michelle Campos, Emelyn Acevido, Charisse Bañez, Louvaine Erika Espina, Sofia Almonte, ug Andy Magno. Illegal silang gidakop, gidagit, ug gipriso sa kampo sa militar ug gipailalum sa mental ug/o pisikal nga tortyur sa wala pa ihatag sa pulis para pri-sohon. Gipasakahan sila og mga kaso sama sa *illegal possession of firearms and explosives, homicide, murder*, ug paglapas sa Anti-terrorism Act.

## Target ang bulnerableng kababayan-an

Tinuyo usab nga ginatarget ang mga mabdos o bag-ong nanganak nga giakusahang Pulang manggugubat o asawa sa Pulang manggugubat. Bisan ang puya dili luwas sa pagdagit sa mga militar.

Niadtong Enero 13, 2021, bandang alas-2 sa kaadlawon, gisulod sa mga sundalo gikan sa 79th IB ang balay nila Edwin ug Marlyn Madin sa Barangay San Fernando, Talisay City, Negros Occidental ug gidakop ang duha ka bulan pa lang



niadtong panahona nga si Baby Marx Cairo Salino. Gihimo nga *hostage* sa AFP ang bata aron pugson ang iyang mga ginikanan nga myembro sa Bagong Hukbong Bayan nga magsurender. Hangtud karon, gihikaw sa DSWD ang pagkustodiya kay Baby Marx sa iyang lolo ug lola, subay sa mando sa AFP.

Sa pagkagrabe sa krisis sa ekonomiya ug pulitika sa nasud, labaw pang mikusog ang kabangis nga naagian sa kababayan-an. Ug sa pagkagrabe niini, siguradong modaghan pa ang mga babaye nga mobarog aron tapuson ang pyudal-patriyarkal ug burgis-dekadenteng sistema.

Sumala sa Makabayang Kilusan ng Bagong Kababaihan, 65 ka tuig human gipatay ang mag-igsuon nga Mirabal, labaw pang nahimong makahuluganon ug importante ang rebolusyon. Ang armadong pakigbisog nga adunay sosyalistang perspektiba lamang ang nagpabiling mahukmanong dalan aron tapuson ang kabangis nga nakabase sa kasarian hangtud sa hingpit nga kagawasan sa kababayan-an.

AB